



**PARTURE PARTANGIAN KELUARGA DI GANUP BAGAS
HKBP SA - RESSORT TANJUNG MORAWA
DISTRIK XXIX DELI SERDANG
KAMIS 03 MARET 2022**

1. MARENDE : BE. No 24 :1+3 Tatap hami on na pungu dison

- 1) Tatap hami on na pungu di son, ai nanaeng pujion nami denggan ni basaM di hami. Tatap hami on, na pungu di son
- 2) Sai ramoti be hami on sude maradophon musu nami, asa unang mago hami. Sai ramoti be hami on sude.

2. VOTUM-INTROITUS

- U : Marhitehite goar ni Debata Ama dohot Goar ni AnakNa, Tuhan Jesus Kristus dohot goar ni Tondi Parbadia, na tumompa langit dohot tano on.
- H : Amen.
- U : Ai dokhononNa do angka SurusuruanNa taringot tu ho, asa diJaga ho di angka dalanmu sudena. Sai tangantanganonnasida do ho, asa unang tartuktuk patmu tu batu. Haleluya .. martangiang ma hita... ale Tuhan Debata, Amanami na di banua ginjang asi ma rohaM di hami halak na gale on. Diida Ho, na gogo do musunami, sai talu do hami di bahen ala ni hagaleonnami. Di bahen i hupangido hami tu Ho: sai pargogoi jala pamonang ma hami maralohon musu i marhite hite panaonon ni Anak haholongan ni rohaM, Tuhan Jesus Kristus. Amen

3. EPISTEL : Roma 10:8-13

- U : Hata ni Debata epistel di partangianan ta borngin on ima na tarsurat sian roma 10 : 8 - 13, On do tahe didok: "Talpe do di ho hata i, di bagasan pamanganmu dohot di bagasan roham do!" I do hata haporseaon i na hubaritahon hami.
- K : Ai malua ma ho, molo diparhatopot pamanganmi Tuhan Jesus i, huhut dihaporseai roham, naung dipahehe Debata Ibana sian angka na mate.
- U : Ai roha i do porsea, asa tu hatigoran; pamangan i do mangkatindangkon, asa tu haluaon.
- K : Ai didok surat i do: "Ndang sipailaon nasa na porsea di Ibana!"

U : Ai ndang adong imbar ni Jahudi manang Junani; ai Sada do Tuhan ni saluhutna, naung marbasabasahon sian hamoraonna tu saluhut angka na manjou Ibana.

K : Ai "malua do ganup na manjou Goar ni Tuhan i!"

U : ido sahatna, Martua do na tumangihon hata ni Debata jala na Umpeopsa. Amen

4. MARENDE : BE. No. 814 : 1 Sai ajari au Tuhanhu

1) Sai ajari au Tuhanhu di na martangiang au. Patuduhon tu rohangku sngkap ni rohaM di au. Songon na binaen ni Jesus na manaon humokhop au. Unang lomo ni rohangku, lomo ni rohaM ma saut.

5. **JAMITA: 5 Musa 26: 6 - 10a** (Martangiang, Manjaha Turpuk, manjaha jamita)
- 26:6 Alai ro ma halak Misir mambahen na so uhum tu hami, jala dirupa hami, jala diampehon ulaon na poran tu hami.
- 26:7 Jadi manganguhi ma hami tu Jahowa, Debata ni ompunami, gabe ditangihon Jahowa do soaranami jala marpanatap rohana di pardangolan, hangaluton dohot hagogotan na huahap hami.
- 26:8 Dung i ditogihon Jahowa ma hami ruar sian Misir marhite sian tangan na gogo dohot marhite sian botohon na toltol dohot marhite sian hasonggoton bolon, mardongan angka tanda dohot halongangan.
- 26:9 Jala diboan hami sahat tu inganan on, jala dibasabasahon tu hami tano on, tano habaoran ni susu dohot situak ni loba.
- 26:10 Nuaeng pe, ida ma, ahu mamboan patumonaan ni parbue ni tano, na nilehonmi tu ahu, ale Jahowa!

Malua do ganup na manjou goar ni Tuhan i

Huria ni Tuhanta , Adong hata ni ende na mandok songonon, Berkat Tuhan, mari hitunglah, kau kan kagum oleh kasihnya. Sian on boi do talapati na so hasudahan do hape silehonlehon ni Tuhanta i. jala na tutu ma i. Ai dia ma hasuhatanta be pasupasu ni Tuhan na ta jalo i di ngolunta on sian si haetehonta i sahat tu naung mangodang hita sahat tu tingki on. Jala tung so adong be na boi mangarar dohot mambalos saluhutna i. Alani i aha ma si bahenonta di naung tajalo dengan basa ni Tuhan i di ngolunta on. Molo tapaihutihut do turpuk jamita sian buku 5 Musa on ima sada buku na mambaritahon barita

taringot tu pangaramotion ni Debata, dohot pardalanan ni ngolu ni ni halak Israel mamungka sian parhatobanon ni harajaon ni Misir sahat tu na mate si Musa. Tutu tangkas naeng botoonta ia barita ni buku on ndang haru sahat dope bangso Israel i tu tano Kanaan. Alani i, on ma pangajarion ni si Musa tu bangso i, dohot jamita andorang so sahat dope nasida tu tano Kanaan. Di jamita ni si Musa on tangkas do di ajarhon asa marparange ma halak Israel songon sada bangso naung pinalua jala songon hataridaan na mar- Debatahon Jahowa. Nunga godang angka naung binahen ni Jahowa tu Bangso Israel uju di halongonan bangso i. ndang olo Tuhan i maninggalhon nasida atik pe sipata olo do nasida manimbil sian dalan ni Tuhan ta i.

Huria ni Tuhanta sipata olo do hita lilu di ngolu on jala na so tasadari gabe olo hita mandao sian Tuhanta i. Alani i porlu do ingotonta di tingki ro angka na masa di ngolunta on tarlumobi ma na paet i, naeng do ingot hita di angka na denggan na binahen ni Tuhanta tu hita andorang so ro na paet i. taingot manjou goar ni Tuhanta i, asa unang dao hita tu Ibana atik pe mangadapi hamaolon manang na paet. Ai molo jonok hita tu Tuhan i jonok do nang Ibana **(Jakobus 4:8a Pajonok hamu ma tu Debata, dung i pajonohonna ma tu hamu!)** Jala Jonok do Tuhan i di angka na manjou goarNa. Didok di **Jeremia 33:3 Joujou ma ho tu ahu, asa hualusi ho, asa hupabotohon tu ho hata angka na bolon dohot na songkal, angka na so binotomi.**

Di na sai manganguhi bangso i di habungan misir ditangihon Debata jala tuat Ibana laho paluahon nasida **(2 Musa 3:7-8a Dung i ninna Jahowa ma: Nunga tangkas huida pardangolan ni bangsongku na di tano Misir i, jala nunga hutangihon angguhangguknasida i maradophon angka na pasosaksosak nasida; ai nunga huboto parniahapannasida i. Ala ni umbahen tuat Ahu paluahon nasida sian tangan ni halak Misir).** Ro Tuhan i marhite na manongos si Musa laho paluahon nasida, alani malua ma nasida. Nandang holan malua songoni nasida alai di togihon do nasida mulak tu tano naung di uwarihon ni Jahowa tu bangso i, ima tano kanaan.

Huria ni Tuhanta na hinaholongan di bagasan Tuhanta i naeng do tangkas botoonta panarihon ni Tuhanta i tu hita ndang marnasuda i. Hot doi ro di saleleng ni lelengna songon na pinatupaNa tu bangso Israel i. Naeng ma tangkas tahangoluhon denggan basa ni Debata. Hita naung manjalo haluaon na

pinarade ni Debata marhite Anakna Jesus Kristus i. Naeng tongtong tapasahat ngolunta laho pasangaphon Debata. **(I Korintus 6:20 Ai arga do hamu ditobus: Dibahen i pasangap hamu ma Debata marhitehite dagingmuna dohot marhitehite tondimuna; ai Debata do nampuna i.)**

Di naung di pasahat haluaon tu ngolu on dohot ma ta pasahat nang pelean hamuliateonta tu Tuhan i, ta pasahat ma pelean na denggan, (10a) pasahat patumonaan niula, lapatanna sai tapasahat parjolo na ta sari i tu Debata songon dalanta manghamuliatehon denggan basana i tu hita. Ala tongtong do hita disarikhon Jahowa di ngolunta on. Invocavit “ jouonna ma Ahu, Jadi alusanhu ma Ibana “ sai ta jouma Tuhanta i di ngolunta di las ni roha nang di arsak ni roha, ditingki dapot pasupasu nang hamaolon, asa sai Ibana na mandongani jala manogu hita. Amen

6. MARENDE: BE. No 434:1 “Tuhan Jesus bereng au”

- 1) Tuhan Jesus bereng au di son, ro ma au marsomba tu JoloM. Mansai leleng au manjua. Nandang tarbahen au martua. Di lului ho ale Tuhan au, di ihuthon Ho au tu na dao. Naung dapotan au di ho, Tuhan di son do au. Sae dosangku di bahen Tuhanki, monang au dibahen mudarNa i. gogo do dilehon Tuhanhi di au, di au

7. TANGIANG SIAN ANGGOTA KELUARGA

8. MARENDE : BE. No 811:1 Di au ma ho Tuhan

- 1) Di au ma ho Tuhan di ari aringki. Ai denggan ni basaM padame rohangki. Di sude partingkian, di sude inganan; di au ma ho o Tuhan, asi ro haM.

9. TANGIANG PANUTUP – ALE AMANAMI – PASUPASU

PELEAN PARTANGIANGAN DI GANUP BAGAS KAMIS, 3 Maret 2022

SIAN KELUARGA : _____

SEKTOR : _____

JUMLAH :Rp. _____ (.....)